

A l'ur da l'abiss

Pleds clers d'in uvestg catalan

DA GUIU SOBIELA-CAANITZ

■ **Suenter la demissiun da l'arch-uestg da Barcelona per motivs da vegliadetgna, spetga la Catalogna la nominaziun dal successur. Entant creschan ils duairs da l'uestg auxiliar Joan Carrera Planas.** El ha scrit in commentari d'etica politica en il bulletin «Catalunya cristiana» dals 27 da matg 2004, pia suenter las discussiuns e manifestaziuns che han accumpagnà la vieuta spagnola da mars ed avrigl. L'artitgel catalan è entitulà: «L'Iraq, la història continua».

Tge ans riguarda quai?

Uvestg Carrera citescha l'emprim in pled da papa Pius XII (Eugenio Pacelli, 1876–1958) surpiglià da ses successur Gion XXIII (Angelo Giuseppe Roncalli, 1881–1963): «Cun la pascha na perd'ins nagut, cun la guerra pon ins perder tut». Qua pon ins far endament era lur antecessur Benedetg XV (Giacomo Della Chiesa, 1854–1922); lez, amez l'Italia naziunalista ch'aveva mess ad ir 1915 ina guerra da rapina cunter l'Austria-Ungaria, ha numnà profeticamain il conflict ina «inutile strage». Carrera crititgescha las

cruschadas dal passà e cunzunt quella ch'ils generals rebels spagnols da 1936 han proclamà «per dar in pretext moral a lur putsch». Lura recumonda' ch'ins na patratgia be a l'Irac, mabain er «a Guantánamo, cun praschuniers che n'han gnanca las garantias legalas las pli fundamentalas, ed a la Tschechien, nua ch'ins lascha ils praschuniers uras ed uras en cisternas enfin ch'i 'confessian'. Pon ins giustifitgar cun la segirtad legitima che tractors d'in stadi costituziunal zappitschian chasas da famiglias palestinaisas?» Ussa l'Irac, nua che «l'illusiun d'ina liberaziun

ch'ils Iracais beneventassan cun bratscha averta è vegnida trumpada da la realitad d'in'occupaziun cumbattida (...) cunzunt dals inimis dal tiran Saddam Husain». Lur il mender: «En il scandal da las torturas ha l'Occident la rolla principala. Suenter uschè blers cudeschs e films davart la demenza dals reschims totalitars dal 20avel tschientaner, avainsa stuì renconuscher cun snuizi che la capacitad umana da crudar en ils pirs traviaments na saja tuttina betg svanida (...). Quai sto umiliar nossa cultura [cuminaivla] occidentala e democratica.» L'uestg concluda

tirondament che papa Gion Paul haja s'oppost a la guerra da l'Irac: «El ha gist insistì schend: 'Nus essan a l'ur da l'abiss; nus stuain ans fermar'.» Daco «nus»? Daco «ans fermar»? Tge ans regardan malfatgs da la soldatesca americana en ina praschun da l'Irac? Papa Gion Paul, puspè el, ha gia respundì en ses pled dals 13 da schaner 2003 al corp diplomatic davart la globalisaziun: «Tuts stadis èn colliads en semen, en il bun sco en il nausch» (*).

*) Cità en: Benjamin R. Barber, *Imperium der Angst. Minca* (C. H. Beck, ISBN 3 406 50954 1) 2003, p. 228.